

SOTA SOLAT NEN SAN PABLO PARA SO NONTA IRA I-PILIPOS

¹ Si-kak si Pablo, ja makasolat niyay et say kadwák, si Timoteo. Si Cristo Jesus i mismon engibetkag son si-kami ja mansilbi son si-kato; isonga itnengi jon pasiya iya ikowan mi. Jet sajay ya solat, para son si-kayon emin ja kait min too nen Jesus ja wáred siyodad ni Pilipos, agdalo son si-kayon pangolo ni ematid tan, tan son si-kayon para tolong met laeng so nonta ira emati.

² Say shawat ko son Apo Shiyos, sapay koma ta kaasi-an shakejo, tan a-shoman to pay sota talna ja wára son si-kayo ja edapo met laeng son Apo Shiyos ja Ametayo, tan si Apo Jesucristo.

No nemnemen takejo, naka man-imdeng

³ Si-kayon tood Pilipos, eg takejo dibdibkan. Isonga no nemnemen takejo, naka man-iyaman son Apo Shiyos ja naka shedjawa, ni may-pangkep son si-kayo,

⁴ jet no manshewatak son Apo Shiyos ni pansigshan jon emin, naka man-imdeng ni olay.

⁵ Ta ekak dibkan sota inpankakadwa tayo ja engikowan nonta mapteng nga shamag pangkep so nen Cristo nanshogi nonta badbado kayo nin ja emati, ingkato niman.

⁶ Jet ebadeg i namnamak ey si Apo Shiyos, ja engaasi son si-kayo nonta pilmiron emati kayo son Cristo, si-kato met laeng i mengitodoy so

nontan na mapteng nga obda to son si-kayo ingkatod onsabi ali sota akew wa idaw mowan nen Jesucristo ja mandepod dangit. Ta sotan aliy ka-enay ni kaysedakan jo.

⁷ Anam ton sajay mango i wared nemnem ko pangkep son si-kayon emin, ta ebadeg i naka pengisekit son si-kayo. Ta sota kaasi nen Apo Shiyos son si-kak, inbetkag towak ja en mengitosho ni mapteng nga shamag et singa kayoka mayda-kam ni olay — inges to nem wára-ak shiya badoran ono nonta ekak naybalod pay laeng. Ta nontan den ewaya-ak pay laeng ja emengitosho nonta mapteng nga shamag pangkep so nen Jesucristo, inatngan jowak, jet niman, eshakel ma iray koston emati.

⁸ Si Apo Shiyos, amta to ey naka mansespi ja piyan kon pasiya ja asen takejo, ta say semek ko son si-kayo, inges toy semek nen Cristo Jesus son si-kayo.

⁹ Jet say shawat ko son Apo Shiyos maypangkep son si-kayo, mas ma-shoman komay semek jo ni sakey tan sakey, tan metaksholan koma ni daing ja medepo son si-kato met laeng, tan kosto komay pannemnem jo ni olay.

¹⁰ Sajay i shawat ko, say amta-en jon memidi ni kamaptengan na ogadi, say eg kayo manbesol, tan say enshiy jo kebedawan niman na kawashayo pay laeng shiya biyag, ingkatod onsabi sota akew wa idaw ali nen Cristo.

¹¹ Piyan kon waray pengasan ko ey agpayson inonod jo sota mapteng nga ogadi ja edapo so nen Jesucristo, ta no asen ni too ey mapteng i ogadiyo, si Apo Shiyos i ishayaw sha, ta si-katoy

kabol ja nanbalbaliwán jo.

Saja naybaloshan ko ket, mapteng i nanbanagan to

¹² Si-kayon a-aki shi pamati, piyan kon amta-an jo ey emin sota digat ja epasemak son si-kak, waray mapteng nga nanbanagan to. Ta sota mapteng nga shamag maypangkep so nen Jesucristo, eshakil i engitneng.

¹³ Jet say pilmiron mapteng nga nanbanagan to, inamta-an ira nonta kowadja ni ari shima baley to, tan angken sota ira emin na wared ja badoran, jey say kabol la naybaloshan ko ket sota maypangkep ni pamatik so nen Cristo.

¹⁴ Jet say sakey pay, karakdan so nonta ira a-aki tayo shi pamati i kimedasang so nen Apo Jesus jet say kabol la kinedsangan sha, saja inkabedod ko. Jet enshi may takot sha ja mengitosho nonta esel nen Apo Shiyos pangkep so nen Jesucristo.

¹⁵ Amtak met kitdi, jey waray eshom ma emengitosho pangkep so nen Cristo, nem say wared nemnem sha, ket apal sha son si-kak, tan piyan sha pay ya onkontra son si-kak. Nem wara ngoy eshom ma emengitosho ja agpayson mapteng i pangkep sha.

¹⁶ Jet sota ira mapteng i pangkep sha, si-kara sota waray semek sha son si-kak, ta amtara ey say inpalobosan so nen Apo Shiyos ey maybedorak, say itakshel ko sota mapteng nga shamag pangkep so nen Jesucristo.

¹⁷ Sota ira mango emengitosho ja ngaaw i pangkep sha, say wared nemnem sha, sota panmaptengan sha bengat, jet sajay i shaka

pandag-a, ta kowan sha ey angka et nem ma-shoman iya naka pandigdigat shiya badoran.

¹⁸ Nem ekak panshanagan iyay. Angken ngaaw i pangkep sha, ono mapteng, no itoro sha et i mapteng nga maypangkep so nen Cristo, man-imdengak pay laeng.

Jet mas man-imdengak pay,

¹⁹ ta amtak ey sota emepespesamak son si-kak, panmaptengan ko met laeng. Jet amtak ey metongpal ali sota mapteng nga panbenagan ko tep kayoka manshewat so nen Apo Shiyos ni pansigshan ko, tan sota tolong pay nonta Ispirito Santo nen Jesucristo.

²⁰ Jet say wared nemnem kon pasiya, nam-namak ey ekak onkapoy ja mansilbi son Cristo, no diket onkedsangak ni olay ja inges toy naka pesing nontan da ingkato niman. Namnamak ey si Cristoy mayshedjaw shi emin na naka dagdag-a, ni kawashak pay laeng shiyay ya biyag, ket no si-katoy kabol la keteyan ko.

²¹ Ta si-kak, niman na wára-ak pay laeng shi biyag, wára-ak son Cristo et naka pandadsaki; nem no meteyak, mas edaddadsakak pay mowan ali shi dangit.

²² Isonga ekak tongolan shiya showa no toway pidi-en ko, ta no on-onongak pay laeng nga manbibiyag, asdeg toy mebedin na dag-en ko.

²³ Isonga entapik i showen panpidi-an ko et ekak tongolan no towed jay ya showa. Singa piyan kon metey say ondawak shagos shima kad-an nen Cristo, ta si-katoy kamaptengan.

²⁴ Nem kasapolan pay laeng ni eshakel la too i kawashak shi biyag, ta waray itolong kon

pansigshan jo.

²⁵ Isonga amtak ey ekak nin metey, ta mese-pol jo pay laeng i tolong ko, say onkedsang i pamatiyo, jet man-imdeng kayo nodtan na pamatiyo.

²⁶ Kenshat ta mebodosa, ta no sotan i medeka, mas pay ya si Cristo Jesus i panshedjawan jo, ta wara-ak da son si-kayo.

²⁷ Asas joy itsora ni ogadiyo. Mesepol la may-enam shi toro pangkep so nen Cristo, say no angken bilang ey ondawak da, ono enshi, mapteng ali komay shamag maypangkep son si-kayod tan, ja saksakey i nemnem jo; kasta met i pangkep jo. Amta-en ko koma di ey kayoka mantitinolong, say eg kayo ma-ebak no kontra-en shay pamatiyo ja edapo nodta mapteng nga shamag pangkep son Cristo.

²⁸ Jet say piyan kon amta-en pay pangkep son si-kayo, eg jo tekotan sota ira makakontra son si-kayo, angken ngantoy pesing sha. No eg jo ira tekotan, sotan i amta-an sha so ey si-kara et ngo mowan i ma-ebak ni anongosto jet si-kayo i isalakan nen Apo Shiyos. Si Apo Shiyos met laeng i mengipa-amta nontan son si-kara,

²⁹ jet ewatan sha ey angken sota joka pandikat, ontolong si Apo Shiyos son si-kayo, ja eg shakayo i-oway. Ta aliwen sota inpamatiyo son Cristo bengat i inpalobos nen Apo Shiyos son si-kayo, no diket inpalobos to pay ja manda-kam kayo ngo ni digat pangkep son si-kato.

³⁰ Nontan da, inon-an joy inpalikat sha-ak so ni makakontra son si-kak ni naka pansilbi son Cristo, jet shinemag jo pay jey angken niman,

marama pay laeng. Jet niman, angken si-kayo ngo, joka panda-kami iyay ya digat.

2

Si Apo Jesus i onoran jo shi emin na dag-en jo

¹ Niman, no waray dineknayon kedsang ni nemnem jo ja in-akan nen Cristo son si-kayo, ono semek to son si-kayo ja emengi-kan ni diwdiwa, ono pineshas jon inshalan tokejo ni Ispirito Santo nen Apo Shiyos, ono amtayon mengaasi, iyay i ibilin ko ma son si-kayo.

² Pansaksakey jo ngarod i nemnem jo, ja mewad-an ni semek so ni sakey tan sakey son si-kayo, tan mewad-an pay ni saksakey ya pangkep. No sajay i pesing jo, ma-enay iya imdeng ko.

³ Nemnem joy pansigshan ni kait jo, aliwen sota bakdang jo bengat i jo nemnemnemen, eg kayo ondastog. Pankombaba kayo et mango, jet ibidang jo ngoy eshom ey waray amtara nem say si-kayo.

⁴ Mesepol la eg jo ipilit i kostoyo shi eshom; no diket nemnem joy kowan ngo ni eshom.

⁵ Sajay ira den inkowan ko, si-katoy mapteng nga nemnemen jo, ta mesepol la si Cristo Jesus i onoran jo.

⁶ Si Cristo Jesus, sigod ja inges toy itsora nen Apo Shiyos, nem eg to inpilit ja on-onong nga inges nen Apo Shiyos.

⁷ Isonga inbiyang to nin i kina-inges to son Apo Shiyos et dimaw alin nanbalin ni too, ja nay-anak, jet singa baga-en i kasesaad to.

⁸ Jet nonta nanbalin ni too, inbaba toy bakdang to shorog et in-onod ton angken manda-kam ni kabebaing nga ketey to shi koros ja singa bimasol et ngo mowan.

⁹ Isonga si Apo Shiyos, inngato to ma niman i kasesaad nen Cristo, jet inpanbalin ton kangeto-an ni emin, ja enshiy maka-inges so.

¹⁰ Angken sipa shi dangit, shiya dobong, ono shi nayshalem ni bo-day, mantedimokod ira ni shayaw sha so nen Jesus.

¹¹ Jet angken sipa, ikowan sha met laeng ey si Jesucristo, si-katoy Apo, jet sotan i kayshedjawan met laeng nen Apo Shiyos ja Ameto.

¹² Si-kayon a-akik shi pamati ja ensemek ko, nontan na wara-ak son si-kayo, no waray ikowan ko, joka pati-a. Jet angken niman na enshi-ak koma son si-kayo, mas tongpalen jo koma pay iya bilin ko son si-kayo. Insalakan shakejo nen Apo Shiyos, isonga mesepol la man-edisto kayon ontongpal so ni bilin to. Nem mesepol la eg kayo mansheshinel, no diket mewad-an kayo ni takot son Apo Shiyos.

¹³ Ta angken si Apo Shiyos, eman-obda ngo ja emengitoshong son si-kayo, say mapiyal kayo ja mandeka ni piyan to.

¹⁴ No waray dag-en jo, obdayo, eg kayo mankotot, ono mansosongbat,

¹⁵ say enshiy jo kebedawan, ono jo panbesolan. Ta si-kayo, annak shakejo nen Apo Shiyos jet si-kayoy mengilewag ni podno so ira niya tood ja dobong ja ma-owap tan poron makedsel. Si-karay naydaokan jo et piyan kon eg kayo ma-edinan.

¹⁶ Ikowan jo so ira nonta eg emati sota esel nen Apo Shiyos pangkep son Cristo, say mewad-an ngo ira ni biyag. No sajay i pesing jo, ebadeg aliy imdeng ko nem ka-onoran alin timpon imotok nen Cristo, ta si-katoy pengamta-an ko ma ni nanbanagan ni obdak, ono nandigatan kon engitosho son si-kayo.

¹⁷ Angken bono-en sha-ak, man-imdengak pay laeng. Arig toy ogadi min Hodiyo, ja no mandeton kami ni animal son Apo Shiyos, mika iso-jat met laeng sota shaletto nodta bakdang ton emankaiton say ma-enay. Jet singa inges to ngo sota shalak, ja si-kato ngoy mayso-jat nodta daton jo. Nem sota mismon daton jo, si-kato sota joka pandigdikat ni maypangkep ni pamatiyo. Siya, man-imdengak et meki-imdeng kayo ngo son si-kak.

¹⁸ Piyan kon man-imdeng kayo koma ngo pangkep ni sajay, ja inges toy naka pan-imdeng.

Ibetkag ko la si Timoteo, asan si Ipaprodito

¹⁹ Jet niman, naka namnama-a ey no ipalobos nen Apo Jesus, ibetkag ko len shagos si Timoteo son si-kayo, ta piyan kon amta-en kon mismo i maypangkep son si-kayo, say man-imdengak.

²⁰ Enshiy eshom ma toon maka-inges ni naka pengisekit son si-kayo, nem eg si Timoteo bengat.

²¹ Emin ira sota eshom, say shaka nemnem-nema, sota bakdang sha bengat, aliwen sota maypangkep so nen Jesucristo.

²² Nem si Timoteo, amtayo met ey waray nanbanagan ni obda to. Timolong pay son si-kak ja engitosho nonta mapteng nga shamag

maypangkep so nen Jesucristo, ja inges toy itsora ni tolong ni sakey ya anak so ni ameto.

²³ Isonga naka namnama-a ey ibetkag ko len shagos si Timoteo son si-kayo. Nem asen ko nin no ngarantoy panbenagan niya kasok.

²⁴ Nem waray namnamak ey ipalobos nen Apo Shiyos ja ondawak den shagos son si-kayo.

²⁵ Ninemnem ko pay ey mesepol la ibetkag ko la si Ipaprodito ja on-oli shita kadnan jo. Ta naka ikari ey si-kato, epateg ga agik shi pamati, tan sakey pay, etoled ja kadwak ni mika pansilbi so nen Jesucristo. Salamat ta inbetkag jo di, ta ebadeg i tolong to son si-kak.

²⁶ Nem niman, eg maynemneman tep shinemag to ey inamta-an jo kono ey emansekit, isonga piyan ton pasiya ja on-akad da.

²⁷ Agpayso noman ja nansakit, jet istay pay ya metey, nem si Apo Shiyos, kinaasi-an to. Jet aliwen si-kato bengat i kinaasi-an nen Apo Shiyos, no diket angken si-kak, ta no etey si Ipaprodito, istay ma-shoman pay sota digat ko, ta mandeshingitak kabol son si-kato.

²⁸ Isonga angken si-kak, piyan kon pasiya da ja angken on-akad si Ipaprodito shita kad-an jo, say man-imdeng kayo mowan ni i-asas jo son si-kato. Jet no man-imdeng kayo, singa onka-jas may naka pannemnem son si-kayo.

²⁹ Pa-sas jo son si-kato i ebadeg ga imdeng jo no onmotok da, ta si-kato, agi tayo shi pamati et anam ton rispito-en jon emin ira sota inges nen Ipaprodito, ja epateg i dingka to.

³⁰ Ta say kabol la istay keteyan to, sota obda

ton embel-at maypangkep so nen Cristo. Inposta toy biyag to ja timolong son si-kak, ta sota obden kowan jo ey itolong jo son si-kak, si-kato noman i dimaga so.

3

¹ Jet niman ma, si-kayon a-aki mi shi pamati, pan-imdeng kayon pasiya, ta totoo shakejo nen Apo Jesus. No si-kak, ekak on-egjat ja mengipinpinshowa niya insolat ko la para son si-kayo, ta si-katoy panmaptengan jo.

Say podnon pesing nga maysedakan, si-katoy pemat i son Cristo

² Tanshaaniyo ali sota toon apil i toro sha, ta si-karay mengi-kan ni kolo shi pamatiyo. Ta say itsora ni ogadira, singa aso. Piyan sha pay ya kedkeshen i bedat jo,

³ ta say toro sha, kowan sha ey sota ogadi ni Hodiyo ja kogit, si-katoy ka-amta-an ni toon Apo Shiyos. Nem si-katejo kari i podnon too nen Apo Shiyos, ta sota Ispirito Santo nen Apo Shiyos i emengitoshong son si-katejo ni tayoka panshedjaw son si-kato. Sota pamati son Cristo Jesus i tayoka panshindi; eg kito manshinel bengat nodta toro ni kait tayon too.

⁴ Mebedin ngon waray dason kon manshinel, ta asdeg toy dingkak ni maypangkep ni pamati ni si-kamin Hodiyo nontan da, nem en-asnengak. No kowan ni eshom ey ireka manshinel pangkep ni sajay, mas si-kak koma pay i manshinel,

⁵ ta asdeg toy paras ko ni kina-Hodiyo. Si-kak, poli towak nen Benjamin ja mismon anak nen

Israel, isonga say shalak, poron shala ni Hodiyo. Nonta maykewalon akew ko ni nay-anak ko, kinokit sha-ak, jet no sota maypangkep ni emin na pengonod ni dinteg min Hodiyo, inonod kon emin, ta sakeyak so nonta ira Parisiyo.

⁶ Jet no sota maypangkep ni kinashonong ja medepod dinteg min Hodiyo, enshiy en emalaw son si-kak. Masi-metak ka pasiya ja mansilbi son Apo Shiyos, isonga sota ira epangdon emati son Jesus nontan, pinedigat ko ira, ta kowan ko nem sotan i koston pansilbi son Apo Shiyos, nem apil gayam.

⁷ Nem niman, ta emati-ak son Cristo, emin sotan den dingkak ja istay kowan ko ey epateg, inbilang ko ma niman ey enshiy silbi to.

⁸ Say kabol la inbilang ko so ey enshiy silbi to, inamta-an kos Cristo Jesus ja Apok, jet si-kato may mas epatpateg son si-kak. Maypangkep ni inonoran ko son Cristo, inbiyang kon emin i wára son si-kak et no nemnemen ko, singa ensekig sotan na dingdingkak nontan. Sajay i inpasing ko say metopog i nemnemnemen ko, ja si Cristo ni olay bengat.

⁹ Ta niman ma, wára-ak son si-kato. Jet aliwen sota naka pengonod ni bilin ni Hodiyo i naka panshindin kosto-an son Apo Shiyos son si-kak, no diket towakka kosto-i maypangkep ni naka pamati son Cristo. Ta say kekosto-i nen Apo Shiyos, sota waray pamati to son Cristo.

¹⁰ Jet niman, say naka nemnemnema, sota pengamtak pay ya pasiya ni maypangkep so nen Cristo. Piyam ko pay ya dekna-en sota panakabalin nen Apo Shiyos ni toka penodong son

si-kak, ja panakabalin ton inosal to ni inpanbiyag to so nen Jesus shi patey. Piyan kon mekila-kam ni digat nen Jesus, angken pay ya i-onod kon metey ja inges to.

¹¹ Ta si-kak, waray namnamak ey panbiyag towak ngo ali shi patey ja inges to.

¹² Ekak pay laeng ibilang i bakdang ko ey pineshas kon emin iya maypangkep ni pamati, ono ekak ikowan ey enshiy nak nankolkolongan. Nem say wara son si-kak, naka memasig ey amta-en kon emin na pasiya sota maypangkep so nen Cristo Jesus, ta si-katoy pangkep to ja inda-an towak so nonta pilmiro pay laeng.

¹³ Si-kayon a-akik shi pamati, ekak pay laeng ibilang i pamatik so nen Jesus ey siya, kosto ma. Isonga sota i-abantik bengat i naka nemnem-nema, ta si-kak, may-eshig ey singa naka meki-longba: ekak wingi-en sota wared benegkan ko, no diket naka memasig ga ontorong shi sango-an ko.

¹⁴ Isonga naka takal say posposen ko sota pengintegan ni bebtiken ko, say waray ewaten ko ngon primiyo. Si Apo Shiyos, si-katoy emili son si-kak ja mansilbi so nen Cristo Jesus et si-kato met laeng i mengi-kan ni primiyok da shi dangit.

¹⁵ Si-kayon makedsang i pamati to, say nemnemmen jo, saja inkowan ko la. Nem no waray kait jo ja apil i nemnem to, ja aliwen inges to iyay, si Apo Shiyos i ondawag so ni nemnem sha say amta-en sha ey waray nankolongan sha.

¹⁶ Nem saja ma-ashal pay, mesepol la may-enam nodta inamta-an tayo da, ja podno,

pangkep so nen Jesucristo.

¹⁷ Si-kayon a-aki mi shi pamati, sota inon-an jo son si-kak, si-katoy onoran jo, jet sota toon emengonod niyay ya inkowan ko la, si-kato ngoy pati-en jo.

¹⁸ Eminshakel la inkowan ko son si-kayo sota maypangkep so nonta ira totoon apil i ogadira ja singa ngaaw shay toro maypangkep ni koros nen Cristo. Jet niman ma, pinshowa-en ko la sota inkowan ko son si-kayo et sajay ya maramen naka pan-ikowan son si-kayo, naka mansesaya ni daringit ko.

¹⁹ Sajay iren totoo, sota shosa i emansessesked son si-kara. Say singa shiyos sha, sota ekes sha tep epingit ira ni kompormi. Shaka pay idastog sota aramid shen ngaaw, ja nebeng nga ibebaing sha koma, aliw'en sha ikokowan. Tan say shaka nemnemnema pay, sota kompormin w'ared ja dobong, aliw'en sota maypangkep son Cristo.

²⁰ Nem si-katejo, eg kito naypilmi shiya dobong; singa too kitod dangit. Isonga enshiy eshom ja tayoka sesseskera ja en mengisedakan son si-katejo, nem eg si Apo Jesucristo bengat.

²¹ Si-kato aliy onsa-dat niya bakdang tayon kabeba-an ja manbedin ni inges toy bakdang tod dangit ja emenenili. Jet sajay alin pesing to, osalen toy panakabalin to et sotan na panakabalin i toka osala met laeng niman ja mengitoshay so ni emin.

4

¹ Si-kayon a-aki shi pamati, ebadeg i semek ko son si-kayo, isonga piyan kon pasiya ja asen

takejo. Si-kayoy kawad-an ni imdeng ko, tan si-kayoy ka-asan ni nanbanagan ni obdak. Jet say bilin ko son si-kayo, itodtodoy jon memati so nen Apo Jesus et eg jo pay dibdibkan ey ebadeg i semek ko son si-kayo.

Ka-onoran na togon

² Si-kam Ibodia, tan si-kam ma Sintiki, kekshawen ko son si-kayon showa ey mese-pol la mantabtabal kayo no ngantoy eg jo nan-inawatan. Ta si-kayo, san-agi kayo shi pamati son Apo Jesus.

³ Jet si-kam ma kait kon emepiyal la emansilbi, kekshawen ko ngo ey si-kam i mengolnos son si-kara, no ngarantoy eg sha nan-inawatan. Ta sajay iren bii, ebadeg i tolong sha son si-kak ni naka pengitosho nonta mapteng nga shamag pangkep so nen Jesucristo. Aliwén si-kara bengat i timolong son si-kak, no diket angken pay si Clemente, tan sota ira eshom ma kait kon eman-silbi. Jet say ngaran ira niyay, naysolat ngo nodta dibsho nen Apo Shiyos ja naysolatan ira nonta nay-aknan ni biyag ja enshiy to engintegan.

⁴ Isonga say kowan ko, pan-imdeng kayon pasiya ni olay, ta totoo shakejo nen Apo Jesus, jet ipinshowak mowan ey pan-imdeng kayo!

⁵ Ipa-sas joy ka-anos jo so ni emin na totoo, ta si Apo Jesus, magenon ondaw mowan ali ja medepod dangit.

⁶ Angken ngantoy mepesamak, eg kayo man-shanag, no diket panshawag kayo et so nen Apo Shiyos ni emin na kasapolan jo, tan si-kato pay i pan-iyamanan jo.

⁷ Jet no sajay i dag-en jo, si Apo Shiyos i mengi-kan ni talna shi nemnem jo, ja medepo son si-kato met laeng. Sajay ya talna, enshiy toon maka-awat ja pasiya no toway toka pesing nga mengi-anshal, nem angken na enshiy toon maka-awat, sotan ngo eshan i mengitoshong ni poso jo, tan joka pannemnem, ta too kayon ememati so nen Cristo Jesus.

⁸ Jet niman, iyay i ma-onod ja ibilin ko son si-kayo. Sota maypangkep ni kamaptengan, ono sota kompormin pansigshan ni totoo, si-katoy topogen jon nemnemen. Jet iyay pay iray may-a-shom nodta inkowan ko la ja nemnemen jo: sota podno, kapatkan, tan sota pengonod ni piyan nen Apo Shiyos. Nemnem jo pay sota mapteng ja eg medaokan ni ngaaw, sota sessesmekan shakejo so ni totoo, tan sota eshom ma tayoka aporbalin mapteng.

⁹ Sota intorok son si-kayo ja inashal jo, tan inewat jo, ono sota inon-an jo son si-kak, kasta met sota intenengan jon inkowan ko, si-katoy onoran jo. No dag-en jo iyay, wara son si-kayo si Apo Shiyos ja mismon emengi-kan ni talna.

Naka mansedamat nonta tolong ja in-akan jo di

¹⁰ Naka man-imdeng, tan naka mansedamat so nen Apo Shiyos, ta kimedsang i nemnem jon ontolong son si-kak mowan. Amtak met kitdi ey mapiyan kayon ontolong nontan, nem enshiy pesing jo.

¹¹ Saja inkowan ko la, aliwen naka pan-isingil i eg jowak so tinodongan ali, ta say nemnem ko

ma niman, mepnekak, angken ngarantoy wára son si-kak.

¹² Amtak ma niman ja manbiyag — inges to no esobday kasapolan ko, ono mankodang. Isonga angken ngantoy mepesamak son si-kak, naydowamak mala ja man-enos no enshiy kenen ko, ono wára; no ebitegak, ono baknangak.

¹³ Esagana-ak ja mengitoded ni angken nganto, ta si Jesucristo, si-katoy emengi-kan ni kedsang ko.

¹⁴ Nem ekak toy-an sota intolong jo son si-kak. Mapteng sotan na dingkayo ta nonta kasapolan koy tolong, tinodongan jowak.

¹⁵ Si-kayon i-Pilipos, amtayon mismo met ey nonta indekjas ko i Masidonia ni pilmiron inpan-gitoshok nonta mapteng nga shamag pangkep so nen Cristo, agpayson si-kayo bengat i engi-kan ali son si-kak ni alos jo ja singa sobadit nonta intorok son si-kayo. Ta enshi nontan i en in-akan ni eshom ma emati shi eshom ma dogad son si-kak.

¹⁶ Jet angken nonta wára-ak shi Tisalonika, eminshowa ja engi-kan kayo son si-kak.

¹⁷ Nem aliwén sota in-akan jo son si-kak i naka pan-imdengi, nem say naka pan-imdengin pasiya, inon-an ko ey amtayon ontolong. Jet si Apo Shiyos, si-katoy onsobadit son si-kayon ma-ekan.

¹⁸ Sota tolong jo son si-kak ja inpaw-it jo ali so nen Ipaprodito, inewat ko, jet sotan na in-akan jo son si-kak, imanay shi kasapolan ko, jet simobda pay. Sotan na dingkayo, singa may-eshig ey si Apo Shiyos i in-akan jo so, jet siya, kinosto-an

nen Apo Shiyos tep sotan na dingkayo, in-anam jo nodta piyan ton dag-en ni too to.

¹⁹ Si Apo Shiyos, ja naka panshedjawi, si-katoy mengi-kan ngo ni emin na mesepol jo, ta wára kayo son Cristo. Jet eg nagshengan sota kabedinan ton mengi-kan ni kompormi so ni too to.

²⁰ Si Apo Shiyos ja Ametayon tayoka shedjawa, si-katoy mayshedjaw ni olay ingkatod ingka. Siya, satan da.

²¹ Piyan kon pekikowan joy semek ko so ira nonta emin na emati son Cristo Jesus shitan. Jet angken sota ira a-aki tayod pamati ja kadwak shiyay, kowan sha ngo ey ibalikas koy semek sha son si-kayon emin shitan.

²² Jet emin ira sota ematid ja ilin kawad-an ko, agdalo sota ira ematin wáred baley ni ari, sotan met laeng i kowan sha.

²³ Jet say shawat ko son Apo Shiyos, sota kaasi nen Apo Jesucristo ja wára son si-kayo, sapay koma ta sotan i mengitoshong ni nemnem jo.

**Dibshon Mengi-kan Ni Pansigshan
Ibaloi: Dibshon Mengi-kan Ni Pansigshan (New
Testament)**

copyright © 1978 Wycliffe Bible Translators, Inc.

Language: Ibaloi

Contributor: Wycliffe Bible Translators, Inc.

All rights reserved.

2025-05-03

PDF generated using Haiola and XeLaTeX on 2 May 2025 from source files
dated 3 May 2025

6f85e932-8eee-5911-b890-a31a1da75d8c